



職方典第八百四十六卷

江西總部總論

圖書編 處置

江西界吳楚閩廣之間土薄民勤俗尙儉嗇頗稱安壤南昌省會衝繁吉安健訟奸狡至於豪右掣肘田糧逋負則二郡同也南贛密邇閩廣巢寇時發而贛當其衝故軍門兵備叅將在焉饒州南枕彭蠡九江東據上流江湖水寇四出爲患而饒郡內有藩封邑多頑梗瑞州地窄民頑撫州訟繁多盜袁州臨江建昌廣信頗稱饒富第袁州界湖土民時有爭奪處置爲難故江湖水寇當責撫臣南贛山寇當責督臣有司又能輕徭薄賦養而教之瘠土勞瘁之民庶幾具有瘳乎

水陸扼要

九江據金陵上游湖口爲鄱湖綰轂厥險在澤關津之當警者也其更添舟師而耀之武乎玉山爲入浙之衝鉛山當入閩之扼厥險在陸門戶之當嚴者也亦嘗飭亭郭以示之限乎長寧蓋萬山之中反側子初定設竄匿其中戍守稍不慎不復蹈寧州之轍乎是不可不預爲之防也

江西全省險要

江西延袤割屬歷履不類不可詳道今制所分隸大都境內南北一千九百里東西一千二百里南昌北負大江依湖東北爲饒州盡浮梁東下廣信窮玉山最南南安沮嶺稍轉而西袁州際萍鄉西北則九江界瑞昌此其五大門戶也國家初定天下更置衛所藩屏凡西而南皆設衛如袁如九江如贛而東皆設所如信如饒豈非以楚有洞庭長沙郴衡之險爲江上流盜所根盤而東則浙與徽皆平安號無事者可稍簡易爲防哉鄱湖固大澤壓四郡之境春水溢渺茫萬頃則波濤蕩潏不可湊泊秋高水落塍埂微露則又千條萬港舟入其中鬼伏神藏不可周詰而奸民聚居則行賈風泊不可安致甚或剽劫大姓不逞無忌捕急則入匿其中國家巡司之建一省百一十三所而沿湖者一十有四蓋謹之也他諸嶺北邇廣建信接閩皆萬山盤迴官府捕隸足跡之所不能至民窮或負釁逃入其中教之搏噬出入事連數省則彼此相持莫之誰何彼方恃其窟穴而有司又以逋負急征之無罪虐厲易生其憤心聚而得志其爲隱憂豈可一二數哉其勢非有以剪截之究詰之則且聚不散此非不見形影露端倪也而言無害者冀苟安枕耳故江西大勢凡四鄰有警皆所可畏

而湖口尤爲咽喉境內有警皆一可慮而贛州尤爲樞機蓋大江之舟入自湖口則乘風南指不啻警四郡也倏忽上下一省皆震贛州據上流方舟而北猶建瓴也而數郡皆糜爛矣

### 江湖要害

長江一帶自吉安府起至峽江縣中間張家渡天井壩狗子嶺牛口江龍丘雲洲或居民竄遠墨潭桐江橫釣魚臺或四壁皆山其富口石窩二處雖有人烟尤多土賊峽江縣起至豐城縣中間桐江墓膳烏口象口蓮花潭長排城排城頭潭橫梁孔埠枯州斗角灘涼傘州拖船埠黃埠腦安沙壩老蛤石小港口漳湖渡龍霧洲象牙潭爛泥灣數處港口交雜人烟稀疎尤爲盜賊出沒匿藏之所從此入東湖有黃溪渡趙家園白沙寨漁門寨樊西寨焦湖垠口龍山鄔子梅岐寨南山埂康山上下蛇山五谷潭棠陰柴棚瑞洪四山三山又自樵舍昌邑迤西至具城轉折三橫及中洲等處入西湖倉廩洲兩河口松門吉山罌子口洋瀾渚溪左蠡青湖州山青山大孤山從此出江則城子鎮至馬當內有新開口小池口楊家穴南湖嘴沿州港鱗魚嘴黃茅潭小孤嶺茅湖夾女兒港以上各處所俱稱要害春夏水漲港嶼瀾漫盜賊揚帆縱橫勢或難當秋冬水涸支港縱橫盜賊泊舟伏岸防或

不及甚當晏起早住務要趕趁地頭不可貪程夜行及聽哨子哄誘致其通賊自害

江西總部藝文

論賑濟劄子

宋李綱

臣昨者入覲伏蒙聖慈宣諭江西旱災饑民闕食使之推行賑濟及至境上又奉親筆詔書令勸誘積米之家以其食用之餘盡數出糶以濟流殍之苦臣仰體天意敢不夙夜自竭以奉詔旨自到本路與監司協力行移州縣凡有流徙闕食之民通融斛斗盡令給米收養共賑濟五萬九十二人又給歷州縣遣官簡察令勸誘積米之家減價出糶米麥穀二十一萬八千一百二十四石五斗其間亦有願入米麥以助官中賑濟者臣已各項開具數目別狀奏聞訖復勘本路連年旱歉去歲尤甚臣到任之初米一升價錢至一百三四十文近來雨澤霑足早禾已熟米價頓減新米一升止四五文將來秋成決有可望之理此蓋陛下勸恤民隱至誠惻怛聖德感召和氣之所致然今春小民乏本田畝有不曾種蒔者甚多人情方蘇未宜重取更望朝廷寬假有以涵養之乃爲得計昔周宣遇災而懼側身修行而王化復行前日旱暵安知不爲中興之資在陛下特加聖意而已干冒天威

不勝戰越

乞差軍馬劄子

前人

臣竊見江西路環數千里爲郡十有一爲縣五十有三控引荆湖襟帶吳越爲上流重地去淮南京西道里不遠平時商旅繇獨木渡江自光蔡以趨汴都最爲徑捷當六朝時九江豫章皆重鎮屯兵選帥以臨之今朝廷保據江左審察形勢知此地之要害故與江東荆湖皆置大使付兵二萬假以重權錢糧優裕贍養不闕所以崇屏翰之勢爲長久之策也近年以來軍馬撥隸他將錢米隨亦轉移疆場蕩然無捍禦之備倉廩枵然無蓄積之資而猶建置大帥是有名而無寔其失本意遠矣且以江東荆湖論之建康有張俊一軍當塗有劉光世一軍武昌有岳飛一軍猶足以奮張軍聲以爲捍蔽江西一路獨無兵將沿江上下千里之間殊乏控扼使敵人不來則已如其果來乘間擣虛則無如江西者矣譬猶邪氣之傷人必繇間隙盜賊之妄意必出無備豈可忽哉臣昨者入對嘗具劄子乞先降畫一指揮軍馬錢糧之半伏蒙聖慈察見本末有矜從之意降付朝廷至今未蒙應副臣非不知方朝廷措置淮甸恢復京東西未暇及此然但知進前不知備後非策之得也今沿江所屯

數十萬衆摘萬人以爲一路根本似未爲多臣昨自行在將帶到申世景一軍纔千餘人分遣討捕盜賊已差出三分之二見今諸郡竊發者紛紛未已正緣兵力單弱不能鎮服所致而欲使之捍禦大敵豈不難哉雖依近降指揮招補闕額禁軍然未經訓練何可倚仗非得正兵相兼使呼決誤國事又舒蘄黃三州實爲江西屏蔽見聽本司節制亦無軍馬內舒州隸劉光世蘄黃州隸岳飛臣近已具奏聞乞于劉光世軍中摘那二千人屯駐舒州于岳飛軍中摘那四千人屯駐蘄黃州緩急聽臣節制亦未奉指揮伏望聖慈特降睿旨下都督府如臣前奏所乞差吳錫等軍一萬人充江西大使司軍馬仍令劉光世岳飛分兵屯戍舒蘄黃州與江西相爲表裏庶幾敵人不致窺伺一路生靈恃以無恐不勝幸甚臣以衰病難當重寄已具奏乞依舊在外宮觀差遣必冀矜從然不敢以將去之故不爲國家深慮至計伏望聖察

免江西稅糧詔

明太祖

朕本農夫深和民間疾苦及至親率六師南征北伐備知將士之勞方今天下一統朕以中國精銳駐守遐荒豈但風俗之殊亦有寒暑之異艱難萬狀朕不忍言然欲鎮安吾民必資守邊之力其於

科徵轉運未免勞民理勢相須蓋不得已也念爾江西之民未歸附時土豪割據地方狼驅蠶食貲財一空歸附之後供給繁重已經九年其爲困苦朕甚憫焉今年秋糧盡行優免於歲四海蒼生皆吾赤子愛念之意旦暮不忘緣事有緩急故思有後先咨爾人民體朕至懷故茲詔示想宜知悉

### 江西省營制碑銘

熊人霖

大江而西地爲南服轂不當邊海維我高皇帝削平僞漢親舉玉趾駐會城比大業一統隨碁置衛所備非常天下謐如也後以承平久籍軍漸弱正嘉間王文成用郡邑民兵平逆濠乃稍籍壯丁之餽于郡邑者集之會城令衛弁選軍鋒合肆已而近地水陸關隘桴鼓時起輒益發營士戍之營益虛萬曆末中丞臺乃稍募壯士五百食廩下題請坐營爲之率命曰標營視省營稱精銳居久之坐營來者不皆賢或自尊大不恤兵省營長復多執袴兩者皆耗崇禎壬申歲釐吏不戒於南門之管烽及清江東鄉之郊燧及豐城進賢之圻舊當事檄兩營率出援望寇輒跳值烏程昭度潘公以方伯領廉察屯巡事新至乃收殘卒益募壯士寔其伍選能將將之爲軍鋒而設方略下令郡邑率民兵佐之先聲威敵民庸無驚頃之軍漸振中丞興化石帆解公銜新命來鞠旅將決戰寇乃聞風惶

懼宵遁中丞與公志符謨協遂以幕府事一決於公於是乃復曰一隅之安弗維安一日之暇弗維暇寇今其退迨茲治兵傳器儲精增高益深中丞曰善哉維君及余祇勉哉會家大人掌中樞請于上得俞留郵節銀若干供軍實中丞復請得與贛分取爲增戍費歲爲常乃益大募壯士數千人一軍於白洋一軍於沙溪一軍樂安一軍廣昌而袁臨諸郡俱增廣兵額成率然之勢其在內者則合標省兩營選徒益以新兵分中左右三營皆隸中丞戲下中左兵皆六百右營兵五百軍六百豐城兵三百爲前營進賢兵二百爲後營久之餘寇盡息乃復歸沙溪樂安之半于戲下爲前後二營各四百人其豐進營稱外遊營云戲下五營惟右營更直守近地之堠他皆時時合蒐惟中丞若巡臬若操閫親賞罰之赫然成勁旅中丞與公乃命千夫長百夫長司屯者趣稼饟軍命吏二千石以至百石莫弗勸趣于轉給無俾嗷嗷命匠人營室命輜人爲輜輪人爲輪車人爲車居有處行有衛命桃氏爲刃弓人爲弓矢人爲矢罔弗利命廬人爲廬器函人爲甲罔弗堅乃申命有衆助哉尙勿愆于六步七步四伐五伐七伐粵再申命各營之長曰咨從古起小較建大將旗鼓立勳名則亦有若而人助哉尙桓桓如虎如貔如熊如羆以身先士卒罔弗與士卒同甘苦茲余賞罰惟斷祇哉毋怠

諸將較曰敬受令於是軍無秕政士飽且佚投石超距罔不思當敵取渠魁以報公德會朝議嘉公  
以一道克遙控南贛曷若公撫南贛居上游庇江西諸道用續文成之丕烈尙亦釋明天子南顧憂  
天子曰俞往哉公受命建旗鼓發于南浦里中縉紳先生父老子弟咸暨公德追錢咏歌盈初簡  
冊維茲將較士卒數千人羅送江潯奉公令守地不敢出境迺遮謁余求碑公之制于永永余維昔  
在成周中興召虎旬宣江漢今皇帝神武丕昭誕敷文德選用良翰亦粵有旬宣之臣若潘公勤熙  
乃績澤厥庶民暨于爪士盛哉休歟是誠碑其銘曰卓壯猷兮國柱石桓孔武兮鎮南國高城深隍  
蒐軍實咸宜將士樂且佚貞師中兮三命錫威山陬兮桴鼓息靈萬邦兮永無斃

徵收秋糧稽遲待罪疏

王守仁

臣竊照江西錢糧小民所以不肯輸納與有司所以難于追徵者其故各有三而究其罪歸則責實  
在臣何者宸濠之叛首以偽檄除租要結人心臣特起兵旁郡恐其煽惑卽移文遠近宣布朝廷恩  
德蠲其租稅許以奏免諭以臣民之分激其忠義之心百姓兵丁出戰老弱居守旣而旱災益熾民  
困益迫然而小民不卽離散者以臣旣爲奏請雖明旨未下皆謂朝廷必能免其租稅尙可忍死以

待也夫危急之際則昭之免稅以竭其死力事平之後又罔民而刻取之人懷怨忿不平此不肯輸納之故一也及宸濠之亂稍定而大軍隨至供饋愈煩誅求愈急其顛連困踣之狀臣于前奏已略言之百姓不任其苦强者竄而爲寇弱者匿而爲奸繼而水災助禍千里之民皆爲魚鼈號哭載途喧騰求賑其時臣等既無帑藏之儲又無倉廩可發所以綏勞撫定之者更無別計惟以奏免租稅爲言百姓睊睊胥讒謂命在旦夕不能救我而徒曰免稅免稅豈可待耶蓋其心以爲免稅已不待言尙恨其無以賑之也已而既不能賑又從而追納之人怨益深不平愈甚此其不肯輸納之故二也當大軍之駐省臣等趨走奔命日不暇給亦以爲既有前奏則賦稅必在所免不復申請其時巡撫蘇松等處都御史李充嗣奏稱江西首被宸濠之害乞將該年稅糧軍需等項俱行停免該戶部覆題奉聖旨是各被害地方著撫按官嚴督所屬用心設法賑濟欽此又該給事中王紀奏本部覆題奉聖旨是這地方委的疲困已極自正德十四年以前一應錢糧果係小民拖欠未完的俱准暫且停徵還著各該官司設法賑濟毋視虛文欽此俱欽遵該部備咨前來臣等正苦百姓嗷嗷咨文一至如解倒懸卽時宣布百姓聞之歡聲雷動遞相傳告旦夕之間深山窮谷無不畢達自是而

後堅守蠲免之說雖部使督臨或遣人下鄉催促小民悉以爲詐妄羣起而驅縛之催徵之令不復可行此其不肯輸納之故三也郡縣之官親見百姓之困苦又當震蕩顛危之日懼其爲變其始惟恐百姓不信免租之說指天畫地誓以必不食言既而時事稍平則盡反其說而徵之固已不能出諸其口矣況從而鞭笞捶撻之其遽忍乎此其難於追徵之故一也三司各官舊者既被驅脅新者陸續而至至則正當擾攘分投供應四出送迎官離其職吏失其守糾詰紛拏事無專責如羣手雜繅于亂絲之中東牽西糾莫知端緒既而部使驟臨欲于旬月之間督併完集神輸鬼運有不能矣此其難于追徵之故二也夫背信而行勢已不順若使民間尙有可徵之粟必不得已剗削而取之忍心者尙或能辦也而民之瘡痍已極矣實無可輸之物矣別夫離婦棄子鬻女有耳者不忍聞有目者不忍睹也如是而必欲驅之死地其將可行乎此其難于追徵之故三也夫小民之不肯輸納旣如彼而有司之難于追徵又如此後值部使身臨坐催急於風火百姓怨謗紛騰洶洶思亂復如將隕之隄臣於其時慮恐變生不測謂各官與其激成地方之禍無益國事身膏草野以貽朝廷之憂孰若姑靖地方寧以一身當遲慢之戮乎因諭各官追徵毋急以紓民怨各官內迫於部使外窘

於窮民上調下輯如居顛屋之下東撐則西頽前支則後圯強顏凌誥之辱掩耳怨怒之言身營閭閻之下口說田野之間曉以京儲之不可缺諭以國計之不得已或轉爲借貸或教之典折忍心於捶骨剝脂之痛而浚其血閉目於析骸食子之慘而責其逋共計江西十四年分充軍本色米八萬石折色米三十二萬石改兌米一十七萬石臣始度其勢以爲決無可完之理其後數月之間亦復陸續起解完納是皆出于意料之外在各官誠窘踣艱苦疲瘁已極亦可謂之勞而有功矣今聞部使叅奏且將不免于罪臣竊寃之昔之人固有催科政拙而自署下考者亦有矯制發廩而願受其辜者各官之以此獲罪固亦其所甘心但始之因叛亂旱荒而爲之奏免者臣也繼之因水災兵困而復爲申奏者臣也又繼之因朝廷兩停徵賑貸之旨而爲之宣布於衆者亦臣也又繼之慮恐激成禍變而諭令各官從權緩徵者又臣也是各官之罪皆臣之罪也今使各官當遲慢之責而臣獨幸免臣竊恥之夫司國計者慮京儲之空匱欲重徵收後期者之罪而有罰俸降級之議此蓋切於謀國忠於事君者之不得已也亦豈不念江西小民之困苦與各官之難爲哉顧欲警衆集事創前而戒後固有不得不然者正所謂救焚身之患不遑恤毛髮之焦攻心腹之疾不得避針灼之苦耳

伏望皇上憫各官之罪出於事勢之無已特從省災肆赦之典寬而有之則法雖若屈而理亦未枉必謂行令之始不欲苟撓則各官之罪寔由於臣卽請貶削臣之祿秩放還田里以伸國議如此則不惟情法兩得而臣亦可以藉口江西之民免於欺上罔下之恥矣臣不勝惶懼待罪之至

防守要害

章潢

江西延袤千里疆理而郡者一十有三法制壹一風俗樸淳垂二百年人庶綏靖宜無他患而乃有如桶岡姚源之爲斯任事者之失計也何者桶岡之徒自廣而進耕于潢水鴈湖山谷之間其初不過以起生業資蕃息也後以土地之故與我民違爭強梁項悍日益以甚郡縣吏乃束縛而操切之故彼自棄于我而阻衆稱亂耳姚源之徒固亦類此是以議者咎時之失計謂不當以我土地而資進亡及其違也又不當右我人民而督過之苟明其是非順其好惡則彼之心未必不協於我協于我而政令加焉雖胡越可使也夫桶岡姚源其往者也橫峯之人自浙而入始業陶焉氣習頑犷生齒繁多則鼓禍煽爭遂爲弋陽之患正德所專設郡倅分署其地而撫之振以社倉興以學校譏以保甲制至善也議者猶欲縣其地以圖久安乃以費之鉅而不果今者桀鷔復悍以逞至執吏而質

也夫橫峯其小者也鄱湖匯合三江波濤瀾漫盜賊舸艦率以爲歸遂爲豫章諸郡之患國初常卽康山置署設守備以制之協以巡司邏以衛卒聯以期會制至善也議者又欲鄆子以扼要害乃以地之薄而不果今者桀驁益肆以橫至殺越人而貨也夫鄱湖其小者也高砂之地山林深阻與岑岡三泖相入其人習於攻鬪而易于駭亂遂爲龍南安遠之患正德時因其內附而以新民待之使自保伍而時其調役使自耕鑿而薄其征稅恩意之洽體統之嚴制至善也議者又於羊陂爲隘而戍以譏察焉其後譏察漸弛而隘不爲賴今者桀驁邁禍連年至樹黨而援也夫以勢言橫峯之倚寓不若鄱湖出沒之難窺鄱湖之出沒不若高砂割據之難馴彼之負固已然乃欲以縣一城而制其命愚未見其可也蓋幾有所必先紀綱是也今自時事所見而言則桀驁之徒恆託于市廛而腹心之寄近及乎吏胥況點戍之頻士有怨心職制之分官無信地紀綱之弛如是蓋考諸成制而申嚴之奈何而自弱其弱也夫以類言鄱湖之烏合不若橫峯之保聚橫峯之保聚不若高砂之連交彼之觀釁已然乃示之必攻必滅而益堅其亂志愚未見其可也蓋情有所必明好惡是也今自時事所見而言則桀驁之徒猶戀其室家而毫髮之爭遂忘乎黨與故鼓義而勸自殲其魁聞檄而泣

自質其父好惡之端如是蓋亦原其舊染而與新之奈何而必掩其類也

議說營兵

前人

江右承平日久民不知兵邇者吳楚閩粵之間山箐溪洞之頑乘間竊發往歲流突臨吉諸郡已不勝其荼毒今思愚預防俯從議請建中營于省會而以遊擊領之以待東西之應援建東營于南豐而以叅將領之以固吳楚之門戶建西營于萬安而以守備領之以控閩粵之襟喉設險守固靡不悉至誠有不戰而屈先聲而禡者矣但各營召募非土著以之戍守則歲月之無期餽乏糧餉恐供億之難繼故愚以爲禦寇而藉召募之兵則寇未至而我益勞守望而資土著之民則寇可待而我常逸昔人云屯兵十五萬可去言老弱之當汰也爲今之計不必易民而教特教之者無其素耳誠能于精常二兵慎其揀選汰其老弱而後畀之闡師使之更番操練專委任以責成之則人人皆壯勇也何患乎兵之不精哉不必加賦而益之特賦之者無其術耳誠於額編工食取之有時用之有節而寔惠于兵民毋令冒破虛耗督逋負而禁絕之則時時有糗糒也何患乎食之不足哉

議屯田水利

前人

夫江西爲衛者三爲所者十一而屯軍分隸歲計屯糧八萬六千有奇以充衛所之軍寔當大有裨于國計者乃今一軍以上悉仰給于縣官軍未贍而民告病矣嘗求其弊則因冊籍廢久轉相欺隱漫不可詰曰絕伍湮沒也曰猾卒盜沽也曰民田勢錯也曰礎瘠鮮獲也又其甚者有衛所勢不聯絡如南昌錯落於東流建德撫州分布于安仁餘干地遠業曠久無根柢也兼之督率者役什伍于私門收屯租于己索致使按圖索糧僅如捕影或者以軍民株連告訐橫出輒委之不問焉非計之得也昔唐韓重華爲營田使東起振武西逾空州墾田三千八百餘里歲收粟二十萬石省度支錢二十餘萬緡彼時沿邊之地皆藩鎮所專猶行之得利若此況江省列在中土清理見在之田安得倡陳恕不測之言范睢括牛之說乎是故按開屯之籍則欺隱之端可求勘原田之界則侵占之迹可檢田有肥瘠則履畝之稅不可以不別卒有老弱則番休之制不可以不明歲清勾之法則逃亡之數可補申占役之律則私役之弊可革擇賢吏焉假之歲月不事搏擊以需漸理不撓浮議以責成功如是而屯政不修未之有矣江西列郡爲州者一爲縣者七十有二陂塘無慮數萬有奇以興一方之水利宜大有益于民事者乃今修濬方新而旋復壅決所在控告者月無虛牘而民事無補